

दिनांक 02.11.2025
समय: 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजनलाल शर्मा कह्यो-न्यायपालिका लोकतंत्र रो मजबूत स्तम्भ है।
- प्रदेश मांय काले सूं शहरी सेवा शिविरां रा फॉलोअप कैम्प लगाया जावेला।
- देवउठनी एकादशी माथे राज्यभर मांय धार्मिक अर सामाजिक कार्यक्रमां रो आयोजन।

अर

- आईसीसी महिला क्रिकेट विश्व कप रा फाइनल मांय भारत अर दक्षिण अफ्रीका रे बीचे मुकाबलो जारी।

000

मुख्यमंत्री भजन लाल शर्मा कयो के न्यायपालिका लोकतंत्र रो वो मजबूत स्तम्भ है, जको समाज मांय न्याय अर समानता री अलख जगावे है। सशक्त न्याय व्यवस्था सूं ही नागरिकां मांय सुरक्षा रो भाव आवे है। श्री शर्मा आज मुख्यमंत्री निवास माथे वीडियो कॉन्फ्रेंसिंग रे माध्यम सूं जोधपुर मांय राखी ज्या बार काउंसिल ऑफ राजस्थान रा नुवा बण्योडा भवन रे उद्घाटन जळसे मांय बोल रिया हा। वणां कयो के प्रदेश मांय तीन नुवा आपराधिक कानूनां ने लागू कर्यो है, जिण सूं न्याय प्रक्रिया मांय तेजी आई है।

इण जळसा मांय उच्चतम न्यायालय रा न्यायामूर्ति संदीप मेहता, न्यायमूर्ति विजय बिश्नोई अर राजस्थान उच्च न्यायालय रा कार्यवाहक मुख्य न्यायाधीश संजीव प्रकाश शर्मा समेत केई न्यायाधीश अर अधिवक्ता मौजूद रिया।

000

मुख्यमंत्री सगळा जिला कलेक्टरां ने सुरक्षा सेवावां रे चालता घायल अर सेवानिवृत्त हो चुक्या सैनिकां री समस्यावां रो प्राथमिकता सूं समाधान करने रा हुकम दिया है। मुख्यमंत्री कह्यो कि राष्ट्र अर समाज री सुरक्षा मांय आपरो जीवन समर्पित करण वाळा सैनिकां रो सम्मान अर पुनर्वास रे कामां मांय किणी स्तर माथे देरी नीं होणी चाहिजे। श्री शर्मा जरूरत रे मुजब शिविर लगाए समस्यावां ने सुलझावण खातिर भी कह्यो।

000

प्रदेश मांय काले सूं शहरी सेवा शिविरां रा फॉलोअप कैम्प लगाया जावेला। 7 नवम्बर ताई चालण वाळा आ शिविरां मांय बच्चोड़ा मामलां रो निस्तारण कर्यो जावेला। ध्यानजोग है के प्रदेश मांय 17 सितम्बर सूं शहरी सेवा शिविरां री सरूआत व्ही ही। इण मांय जन्म, मृत्यु, विवाह पंजीकरण, पट्टे, नामांतरण अर कर्जा मंजूरी समेत दूजा काम कर्या गया। आ कैम्पां रा बाकी रिया मामलां ने फॉलोअप कैम्प मांय पूरा कर्या जावेला।

000

भगवान बिरसा मुंडा री 150वीं जयंती रे उपलक्ष मांय प्रदेश मांय जनजातीय गौरव वर्ष पखवाड़ा मनायो जा रियो है। 15 नवम्बर ताई चालण वाळा पखवाड़ा रे तैत न्यारा—न्यारा आयोजन हो रिया है। जनजातीय गौरव वर्ष रे उपलक्ष मसंश कोटपूतली—बहरोड़ जिला मांय 92 ई—मित्र केन्द्रां माथे **लाभ संतृप्ति शिविर** राख्या जा रिया है। जनजातीय बाहुल्य बांसवाड़ा जिला मांय सांस्कृतिक, शैक्षणिक अर सामाजिक कार्यक्रमां रे जरिये आदिवासियां री समृद्ध विरासत अर संस्कृति रो प्रदर्शन कर्यो जा रियो है। म्हाणा खबरनवीस बतायो के राज्य स्तरीय जळसो 15 नवम्बर ने मानगढ़ धाम मांय राख्यो जावेला।

000

कोटा मांय सेना भर्ती रैली राखी जा री है। आ रैली 4 नवम्बर ताई चालेली। उम्मेद स्टेडियम मांय हो रही इण रैली मांय काले कोटा, राजसमंद, सवाईमाधोपुर, ब्यावर, करौली अर टोंक रा पढ़ेसरी आपरो दमखम दिखायो। भर्ती मांय आगले चरण खातिर अबे ताई 1200 सूं बत्ती प्रतिभागियां ने अग्निवीर खातिर चुण्यो ग्यो है। रैली मांय आज भीलवाड़ा अर झालावाड़ रा पढ़ेसरी भेळा व्हेला।

000

प्रधानमंत्री नरेन्द्र मोदी काले नुवी दिल्ली मांय विज्ञान अर प्रौद्योगिकी नवाचार सम्मेलन—**ई.एस. टी.आई.सी. 2025** रो उद्घाटन करेला। इण मौके माथे, प्रधानमंत्री देश मांय अनुसंधान अर विकास—आर एण्ड डी ईको सिस्टम ने बधावो देवण खातिर 1 लाख करोड़ रुपया रा अनुसंधान, विकास अर नवाचार योजना कोष रो भी शुभारंभ करेला। तीन दिन रे इण सम्मेलन मांय शिक्षा अर उद्योग जगत सूं 3 हजार सूं बत्ती प्रतिभागी भेळा व्हेला।

000

बीकानेर संभाग मांय गंग नहर जळसो राख्यो जावेला। केन्द्रीय कानून मंत्री अर्जुन राम मेघवाल एक समीक्षा बैठक मांय आ जाणकारी देवता थकां बतायो कि ओ जळसो इण बरस 5 दिसम्बर सूं आगले बरस 26 अक्टूबर ताई चालेला। इण रे चालता बीकानेर, चूरू, हनुमानगढ़ अर श्रीगंगानगर जिलां मांय केई कार्यक्रम व्हेला।

श्री मेघवाल बतायो कि 5 दिसम्बर 1925 ने बीकानेर रा तत्कालीन महाराजा गंगासिंह पंजाब रा फिरोजपुर मांय गंगनहर रो शिलान्यास कर्यो हो। 26 अक्टूबर 1927 मांय इण रो निर्माण पूरो व्हीयो हो। वणां बतायो के गंग नहर राजस्थान ने हरित पट्टी अर अन्न भण्डार रे रूप मांय नुवी पिछाण है।

000

पाली जिला री अरावली पर्वतमाळा माथे बस्योड़ा भीमाणा, बाली, अरावल, तराई अर कांठा समेत न्यारा—न्यारा खेतरां मांय सीताफल री आवक सरू व्हेगी है। सीताफल सूं न्यारा—न्यारा

उत्पाद बणाणे पर खेतर री महिलावां मांय आत्मनिर्भरता बढी है। इण काम मांय नाबार्ड भी महिलावां री मदद कर रह्यो है। और ब्यौरो म्हांगा संवाददाता सूं –

000

प्रदेश मांय देवउठनी एकादशी रे मौके माथे आज न्यारा-न्यारा धार्मिक अर सामाजिक कार्यक्रम राख्या जा रिया है। इण मौके माथे मिंदरा मांय सुंवारे सूं ही सिद्धालुआं री भीड़ निजर आई। सिंज्या ने मिंदरा मांय दीपदान कर्यो जावे है। राज्य मांय केई ठोडा माथे तुलसी अर शालिग्राम रा खास पूजा-अनुष्ठान भी कर्या जा रिया है। बठीने आज सूं मांगलिक कामां री भी फेरुं सरुआत व्हेगी। केई ठोडा माथे सामूहिक विवाह सम्मेलन भी राख्या जा रिया है। भरतपुर, पाली अर डूंगरपुर जिलां मांय शालिग्राम री बैण्ड बाजां रे साथे बारात निकाळी जी। डूंगरपुर जिला मांय जगह-जगह शोभा जात्रावां निकाळी जी।

बठीने तीर्थराज पुष्कर मांय आज सूं पंचतीर्थ स्नान सूं धार्मिक मेला री औपचारिक सरुआत व्ही। पुष्कर सरोवर रा न्यारा-न्यारा घाटां माथे सुंवारे सूं ही मोटी तादाद मांय सिद्धालु स्नान कर्यो। ब्यौरो म्हांगा खबरनवीस सूं –

000

आईसीसी महिला क्रिकेट विश्व कप रा फाइनल मांय आज भारत रो मुकाबलो दक्षिण अफ्रीका सूं हो रियो है। नवी मुंबई रा डी.वाई. पाटिल स्टेडियम मांय खेल्या जा रिया मुकाबला मांय दक्षिण अफ्रीका टॉस जीत र पैल्यां गेंदबाजी करने रो फैसला कर्यो।

000

भारत री अवनी लेखरा पैराशूटिंग विश्वकप री महिलाओं री दस मीटर एयरराइफल स्पर्धा मांय सोने रो तमगो जीत्यो है। दुबई रा अलएन मांय अवनी स्वीडन री **अना बेशनॉन** ने हरार र ओ खिताब हासिल कर्यो। बठीने मिक्स्ड पचास मीटर राईफल मुकाबला मांय भारत सोने अर टीम स्पर्धा मांय चांदी रो तमगो जीत्यो।

000

राज्य मांय लारला 24 घंटां मांय घणखर ठोडा मांय मौसम साफ रियो। नागौर अर सीकर रा फतेहपुर मांय कमती तापमान साढे 12 डिग्री सैल्सियस रे आसे-पासे दरज व्हीयो। घणखर ठोडा माथे कमती तापमान 20 डिग्री सैल्सियस सूं नीचे रियो। बठीने धूप निकळने सूं दिन रे तापमान मांय 7 डिग्री ताई री बधोतरी देखी गई। हालांकि मौसम रो मिजाज काले सूं एक बार फेरुं बदळने रा आसार है। एक नुवो पश्चिमी विक्षोभ रे सक्रिय होने सूं केई ठोडा माथे आवता दो दिनां बिरखा री आस है। मौसम महकमो 17 जिलां मांय बरसात रो येलो अलर्ट जारी कर्यो है। महकमा रे मुजब इण दफा नवम्बर महीनो सामान्य सूं बत्ती ठण्डो रहणे रा आसार है।

000

उपराष्ट्रपति सी.पी. राधाकृष्णन पुस्तकालय ने शिक्षा रो मिंदर बतायो है। वणां कयो के पुस्तकालय एक ऐडी जगह है, जकि आलोचनात्मक दृष्टिकोण ने बधावो देवे है अर मिनख विशेष अर समुदायां ने सशक्त बणावे है। उपराष्ट्रपति आज अंतर्राष्ट्रीय सम्मेलन **“पुस्तकालय समुदायां को सशक्त बनाते हैं—वैश्विक परिप्रेक्ष्य”** मांय वर्चुअल रूप सूं बोलता थकां आ बात कही। इण दो दिवसीय सम्मेलन रो आयोजन तिरुवनंतपुरम मांय पी.एन. पणिक्कर फाउंडेशन कर्यो हो।

000